

# Nkauj Hu Npligsab



**Grace Hmong Alliance Church**

4400 N. Mayfair Rd, Wauwatosa, WI 53225 \* Tel. (414) 643-5272  
[www.ghalliance.org](http://www.ghalliance.org), Email: [info@ghalliance.org](mailto:info@ghalliance.org)

# Taw Qha

Cov nkauj huv phoo nuav, peb pawgntseeg Grace Hmong Alliance Church rhu huv HKM Phoo Nkauj Hu Qhuas Vaajtswv lug tso rua nuav tau hu raa tej lub sijhawm muaj kev nyuajsab.

Pawgntseeg Grace Hmong Alliance Church (GHAC) yog ib pawgntseeg kws zwm rua huv Hauvpaug Koom Moob Qha Txuj Moo Zoo kws zwm rua paabpawg ntseeg Christian and Missionary Alliance (C&MA).

Pawgntseeg GHAC lub tuamtsev nyob rua ntawm W. Congress St. hab N. Mayfair Rd. sistshuam. Nquahu cov kwvtij neejtsaa suavdlawg tuaj moog saib peb, koom peb kev pehawm Vaajtswv.

Pawgntseeg Tej Sijhawm:

Nubkaaj (Sunday):

|                                |                 |
|--------------------------------|-----------------|
| Namtsev/Txivtsev/Cov Hluas     | 9AM-10:00AM     |
| Mivnyuas Yau (Children Church) | 9:00AM-10:00AM  |
| Pehawm Vaajtswv Mooob/English  | 10:15AM-12:00PM |
| Mivnyuas Yau (Sunday School)   | 10:15AM-12:00PM |

Wednesday 6:00PM-8:00PM peb muaj rua cov hluas tuaj pehawm Vaajtswv hab kawm Vaajtswv Txujlug uake (Crosswalk).

Pawgntseeg muaj 3 tug xwbfbw ua dlejnum puv sijhawm. Puab ua num nyob huv tuamtsev Wednesday-Sunday 8:00AM-4:00PM. Thawj Xwbfbw, Kx. Xeev Ntxawg Xoom (715) 218-4193. Xwbfbw Saib Tswvcuab, Kx. Nkaajlev Vaaj (414) 808-9190. Xwbfbw Rua Cov Hluas, Kx. Ntxoov Fwj Vaj (262) 212-6504. Yog muaj lugnug dlaabtsi los hu nug tau.

Thov Tsixob Nqaa Moog Tsev

Uatsaug

## **16. NPLAJTEB VAAJTSWV TSIM TSEG**

Nplajteb Vaajtswv tsimtseg  
Nwg pub peb nyob ibntus  
Txawmyog xaav nyob pestsawg losxij  
Yuav nyob qhov nuav tsi ntev  
Cov ntseeg Vaajtswv yuav nyob  
Lub tsev Ceebtsheej sau ntuj  
Peb yuav nrug Vaajtswv nyob qhov ntawd  
Moog le ibtxhis tsi kawg.

Nplajteb muaj xyoob muaj ntoo  
Zoonkauj kawgnkaus le tag  
Tabsis muaj coobleej xaav has tas  
Yuav tsi muaj nub dluamoog  
Yog mej tsi tau lug ntseeg  
Cale lug ntseeg nwnguav  
Tswv Yexus tuag sau ntoo khaublig  
Txhwv mej dlim mej lub txim.

Nplajteb tsi ruaj tsi khov  
Tsi ntev yuav yaaj yuav pluj  
Qhov txhua chaw kws tuabneeg pheej ntshaw  
Vaajtswv yuav muab povhlawv  
Tswv Yexus txuj kev hlub  
Yog qhov tseemceeb hab ruaj  
Peb ntseeg Vaajtswv tsitseg tsitu  
Moog nyob qhov tsi puamtsuaj.

## 136. THAUS TXUG NUB TIMTSWV TSHUAB RAAJ

Thaus txug nub timtswv lug tshuab raaj hu  
Kuas cov ntseeg moog sau ntuj  
Cov ntseeg Yexus kws tuag lawd  
Yuav sawv txhua tug  
Tswv Yexus yuav lug sau ibntaa ntuj  
Coj cov ntseeg moog uake  
Nwg yuav coj kuv moog  
Ruaqhov Nwg sau kuv npe.

Kuv lub npe Nwg sau huv ntawv ca  
Kuv lub npe Nwg sau huv ntawv ca  
Kuv lub npe Nwg sau huv ntawv ca  
Vaajtswv txheeb huv ntawv  
Yuav pum kuv npe sau ca.

Cov kws tau lug ntseeg Tswv Yexus lawm  
Yuav moog txug Ceebtsheej ntuj  
Puab txhuatug yuav tau moog  
Txais puab tej nqezug  
Yuav tsi muaj leejtwg muaj mob muaj nkeeg  
Huv Vaajtswv lub xubndlag  
Puab nrug Vaajtswv nyob  
Vim muaj puab npe sau ca.

Txhuatug ntseeg Yexus muaj feem  
Nrug Vaajtswv nyob sau Ceebtsheej ntuj  
Tswv Yexus yuav muab  
Ceebtsheej lug ua puab tug  
Puab yuav tau nyob kaajsab lug nrug Tswv  
Yexus tswjteb kaavchaw  
Vim muaj puab lub npe  
Sau ca rua huv Phoo Ntawv.

## 140. THAUS YEXUS ROVLUG TSI MUAJ KEV TSAUSNTUJ

Thaus Yexus rovlug tsi muaj kev tsausntuj  
Thaus Yexus rovlug tsi muaj kev tsausntuj  
Thaus Yexus rovlug yuav muaj kev tshaavntuj  
Nwg yuav coj peb moog nyob sau ntuj.

Nwg yuav coj peb moog nyob sau ntuj  
Nwg yuav coj peb moog nyob sau ntuj  
Thaus Yexus rovlug tsi muaj kev tsausntuj  
Nwg yuav coj peb moog nyob sau ntuj.

Thaus Yexus rovlug tsi muaj kev mobnkeeg  
Thaus Yexus rovlug tsi muaj kev mobnkeeg  
Thaus Yexus rovlug peb yuav sawv pistseeg  
Nwg yuav coj peb moog nyob sau ntuj.

Thaus Yexus rovlug tsi muaj kev quajntsuaag  
Thaus Yexus rovlug tsi muaj kev quajntsuaag  
Thaus Yexus rovlug peb tsi lug kuamuag  
Nwg yuav coj peb moog nyob sau ntuj.

"15 Zaaj kws peb qha rua mej nuav tub yog peb qha lawvle peb  
tug Tswv Yexus tej lug qha kws has tas, nub kws tug Tswv Yexus  
rovqaab lug, peb cov kws tseem ua neej nyob, peb yuav tsi xub  
ua cov kws tuag lawd ntej moog. 16 Thaus tug Tswv Yexus yuav  
lug sau ntuj lug, suavdlawg yuav nov ib lub suab hu nrov-nrov  
sau ntuj tuaj, hab yuav nov tug thawj timtswv ceebtsheej lub  
suab hu hab nov Vaajtswv lub suab raaj suab xyu nrov. Ces cov  
tuabneeg tuag lawm kws ntseeg Yexus yuav sawv huv qhov tuag  
lug. 17 Tomqaab ntawd Vaajtswv yuav coj peb cov kws tseem ua  
neej nyob, nrug cov tuabneeg ntawd uake nrug fuab nrug cua  
moog ntsib tug Tswv sau ibntaa ntuj, peb yuav nrug tug Tswv  
nyob moog ibtxhis le." 1Thexalaunikes 4:15-17 (PTT)

## **148. YEXUS HLUB KUV, KUV ZOOSAB KAWG**

Yexus hhub kuv, kuv zoosab kawg  
Nwg lug paab peb suavdlawg  
Nwg theej kuv txhoj sau ntoo khaublig  
Cawm kuv dlim kuv lub txim.

Thau-u kuv ua dlaabtauj dlaabqhev  
Nwgnuav kuv muab tsotseg  
Ntxwjnyoog ntxag kuv, kuv tsiv dlimplawg  
Tauzoo ibtxhis tsi kawg.

Thaus kws peb tso nplajteb nuav tseg  
Yexus yuav coj peb kev  
Peb zoosab kawg muaj chaw casab  
Yexus yuav coj moog tag.

Thaus peb moog txug sau Ntuj Ceebtsheej  
Peb yuav muaj kev thaajyeeb  
Peb tsi tshaib tsi nqhes dlaabtsi le  
Txhuayaam Vaajtsww npaaj tseg.

Peb nyob sau Ntuj kevtuag tsi muaj  
Yuav tsi muaj kev puamtsuaj  
Yog peb ntseeg Nwg moog le tsi thim  
Yuav tau txuja ibtxhis.

"16 Rua qhov Vaajtsww hhub tuabneeg nplajteb kawg le,  
nwg txhaj khaiv nwg tuableeg Tub lug rua huv nplajteb, tug  
kws ntseeg nwg leej Tub yuav tsi tuag, tabsis yuav tau txuja  
ntevdlhawv moog ibtxhis. 17 Qhov kws Vaajtsww khaiv nwg  
leej Tub lug rua huv nplajteb nuav, tsi yog lug txavtxim rua  
tuabneeg nplajteb, tabsis yog lug cawm tuabneeg  
nplajteb kuas puab dlim puab lub txim." Yuhaas 3:16-17

## 149. VAAJTSWV TXUJ KEV HLUB ZOO KAWGNKAUS

Vaajtswv txuj kev hlub zoo kawgnkaus  
Cawm tau kuv dlim rovlug  
Thau-u kuv pluj nwnguav nrhav tau  
Dligmaug nwnguav kuv pum.

Vaajtswv qha kuas kuv ua sabtug  
Kuv txha le tsi poobsab  
Kuv paub tseeb tas Yexus hlub kuv  
Kuv txha le ntseeg tag-tag.

Kuv raug kev txhawj kev ntshai ntau kawg  
Nwg paab kuv dlhau huvsi  
Nwg coj kuv ua ntuzug lug lawm  
Hab tseem yuav coj moog ntxiv.

Yexus coglug ruajkhov rua kuv  
Tas Nwg yuav tuav kuv teg  
Kuv lub neej ces kawg rua Yexus  
Thaus kuv tseem nyob npajteb.

Thaus kuv lub cev mob qaug zugzig  
Hab txujsa nuav yuav tu  
Kuv yuav tau lub neej tshaavntuj nrig  
Thaus kuv moog txug sau Ntuj.

Kuv nrug Vaajtswv nyob moog ibtxhis  
Ci ntsaa-ab le lub nub  
Kuv tseem yuav hunkauj qhuas Nwg ntxiv  
Ibyaam le yaav thau-u.

## 166. NPLAJTEB NYOB TSI NTEV

Nplajteb nyob tsi ntev Yexus nyob ibtxhis (x3)  
Kuv tsi xaav thim, Kuv tsi xaav thim.

Tomqaab tsausntuj nti tomntej tshaavntuj nrig (x3)  
Kuv tsi xaav thim, Kuv tsi xaav thim.

Nplajteb yuav puamtsuaj Yexus yuav nyob moog (x3)  
Kuv tsi xaav thim, Kuv tsi xaav thim.

Cale lug ntseeg kag muab kev txhum tsotseg (x3)  
Kuv tsi xaav thim, Kuv tsi xaav thim.

## 171. THAUS KUV NYOB ZE VAAJTSWV

Thaus kuv nyob ze Vaajtswv, Kuv lub sab kaaj  
Txawm yog txomnyem npaumtwg, Kuv lub sab xyivfaab  
Kuv tsi muaj kev nyuajsab thaus tau nyob ze Vaajtswv  
Ntawm Vaajtswv lub xubndlag muaj kev zoosab xwb.

Thaus kuv txaav dleb Vaajtswv kev txhawj lug ti  
Tsi pumqaab ua zaaj twg, kuv nyob tsausntuj nti  
Thaus ntawd kuv txavtxim sab rovqaab lug cuag Vaajtswv  
Ntawm Vaajtswv lub xubndlag muaj kev zoosab xwb.

Txug thaus ntujtaag tebkawg kuv yuav zoosab  
Yuav pum Vaajtswv tebchaws hab tau moog nyob kag  
Timtswv lug txheeb huv ntawv muaj kuv lub npe sau ca  
Coj kuv moog nyob rua ntawm Vaajtswv lub xubndlag.

Saibntsoov Vaajtswv tshwjchim ci ntsaa quas-ab  
Tej kev ntxhuvsab yaajntshis mas yuav zoo kuv sab  
Kuv yuav ua Vaajtswv tsaug kawg kuv lub sab lub ntsws  
Kuv yuav seevsuab hunkauj lug qhuas kuv tug Tswv.

## 172. NYOB NTAWM TSWV YEXUS LUB XUBNDLAG

Nyob ntawm Tswv Yexus lub xubndlag  
Kuv nyob tsosab phluav tag  
Nwg txuj kev hlub yuav tsomkwm kuv  
Kuv lub sab txha le nyob tug  
Kuv nov timtswv lug hunkauj  
Ua rua kuv zoosab kawgnkaus  
Suabnkauj nrov sau ibntaa ntuj  
Ua rua kuv nyob kaajsab lug.

Nyob ntawm Tswv Yexus lub xubndlag  
Kuv nyob tsosab plhuav tag  
Nwg txuj kev hlub yuav tsomkwm kuv  
Kuv lub sab txha le nyob tug.

Nyob ntawm Tswv Yexus lub xubndlag  
Kev ntxhuvtsab pluj lawm tag  
Kev simsab tsi muaj cuabkaav ntxag  
Tau kuv moog ua phem ua qas  
Nyob ntawm Tswv Yexus xubndlag  
Kuv dlimplawg txuj kev nyuajsab  
Dlim txuj kev txomnyem quajntsuaq  
Yexus so kuv lub kuamuag

Ca Yexus ua kuv tug kwyluag  
Paab kuv dlim txuj kevtuag  
Nwg yuav tsi muab kuv tso povtseg  
Nwg yeejyuav tuavrawv kuv teg.  
Yexus zoo le dlaim txaghla  
Lug tivthaiv sau kuv taubhau  
Yexus zoo le dlaim laagzeb  
Lug tivthaiv ncig kuv lub cev.

## 177. THAUS TXUJ KEV KAAJSAB

Thaus txuj kev kaajsab  
Nkaag lug rua huv kuv lub sab  
Uacaag kev ntxhuvsab txawm lug hab  
Txawm yog le ntawd los  
Tswv Yexus qha has tas  
Kuv tau txais kev kaajsab, kev kaajsab.

Kuv tau txais kev kaajsab  
Kuv tau txais kev kaajsab, kev kaajsab.

Dlaab Ntxwjnyoog xaav ntxag  
Kuas kuv ntsib txuj kev txomyem  
Los kuv zoosab Yexus qha tseg  
Has tas Nwg paub tseeb  
Kuv yeejyuav kov tsi yeej  
Nwg txha nqeg lug ua kuv tug Cawmseej.

Kuv tej kev txhum Nwg  
Muab dlai rua sau ntoo ntsateg  
Nwg hlub kuv Nwg tsi tso kuv tseg  
Nwg ntxuav kuv kev txhum  
Kuas kuv huysi dlawbpaug  
Kuv txhaj hunkauj ua Tswv Yexus tsaug.

Thov Vaajtswv paab kuas  
Kuv lub qhovmuag tau moog pum  
Tswv Yexus nrug fuab nrug cua lug  
Lug txug ibntaa ntuj  
Muaj suab raaj nrov thoob ntuj  
Thaus ntawd kuv yuav muaj kev kaajsab lug.

## **192. KUV THOV TUG TSWV YEXUS UA KUV NTEJ**

Kuv thov tug Tswv Yexus ua  
Kuv ntej najnub moog  
Uake tuavrawv kuv txhaisteg  
Ca Yexus kaav taagnrho kuv lub sab  
Lub cev kws tau yug dlua tshab.

Nrug Nwg moog, nrug Nwg moog  
Nwg yog tug paab peb  
Tsi xob tso Nwg tseg  
Ca Nwg moog uantej  
Noog Nwg Txujlug ua lawv Nwg sabnyam  
Hab ca Nwg kaav kuv lub sab.

Kuv thov tug Tswv Yexus qha  
Kuv paub paab kuas kuv totaub  
Txawj ua Vaaitswv tsaug  
Hab ua rua Tswv Yexus tau ntsejmuag  
Najnub ua tug muab sabnpuab.

Kuv thov tug Tswv Yesus ntuag  
Hab qha kuas kuv paub lub ntsab  
Khaws ca huv nruabsab  
Paab kuv cimntsoov Vaaitswv txuj Moo Zoo  
Kuv txhaj tau Nwg txuj Koobmoov.

Kuv thov tug Tswv Yesus qha  
Kuv thov kuas kuv rau sabntso  
Hab ua sab ntev tog  
Kuv yuav thov taag kuv lub sab lub ntsws  
Muab txhua yaam tso rua tug Tswv.

## **196. TXAAV MOOG NYOB ZE VAAJTSWV**

Txaav moog nyob ze Vaajtswv  
Kuv muaj kev ntseeg  
Thaus kuv vaamkhom Vaajtswv  
Kuv yuav kovyeej.

Txhua caijnyoog txhuanub txhuamo  
Vaajtswv thov nrug kuv nyob  
Tswv Yexus thov tuaj kuv tog  
Thov nrug kuv nyob.

Yeebncuab huv kev tsausntuj  
Xovvaaj vij kuv  
Vaajtswv thov noog kuv hu  
Thov koj paab kuv.

Tseem muaj cuadlaaj cuadlub  
Ua rua kuv ntshai  
Naagxub naagcua ntaus kuv  
Thov Koj tivthaiv.

Yeebncuab muab kuv tsimtxom  
Txuv kuv txujsa  
Vaajtswv thov nrug kuv nyob  
Cawm kuv txujsa.

“1 Tug TSWV, koj yuav tsi ncuqaab kuv moog txug nub twg? Moog ibtxhis le los? Koj tseem yuav tsiv kuv moog txug thaustwg? 2 Kuv tseem yuav tiv kev tsimtxom moog txug nub twg? Kuv lub sab yuav quajntsuag nruabnub hab montuj moog txug nub twg? Kuv cov yeebncuab tseem yuav kovyeej kuv moog txug nub twg hab? 3 Tug Tswv kws yog kuv tug Vaajtswv, thov koj tsaa qhovmuag saib kuv hab teb kuv tej lug thov. Thov paab txhawb kuv tug zug hab tsixob ca kuv tuag.” Ntawvnkauj 13:1-3 (PTT)

## 229. KUV TUG KWVLUAG YOG TSWV YEXUS

Kuv tug kwvluag yog Tswv Yexus  
Nwg tsi tso kuv tseg ibtxhis  
Leejtwg hhub kuv npaum le Yexus?  
Tsi muaj ibtug hhub le Nwg  
Nwg tso kuv dlim dlaab le xibteg  
Lug nyob huv Nwg lub xubndlag  
Kuv yuav muab sab rau ntseeg Yexus  
Leejtwg yuav ua kuas kuv ntshai?

Tej kev txomnyem huv nplajteb nuav  
Txawj ua kuas kuv lub sab ntxhuv  
Kuv raug kev txhawjxeeb ualuaj nuav  
Leejtwg yuav has kuv iblus?  
Kuv yuav nrhav ibtug ua kwvluag  
Nrhav huv nplajteb ntshai tsi muaj  
Yexus tuableeg yuav paab kuv dlim  
Kuv txha tau txuja ibtxhis.

Tej kev txhawjxeeb tej kev quajntsuaq  
Pheej ua kuas kuv ntshai ualuaj  
Kuv muab txhua yaam tso rua Yexus  
Casab ntsoov Nwg yuav paab kuv  
Kuv yuav qha tej kws kuv ntxhuvsab  
Kuv tsi xaav khaws tej nuav ca  
Muab taagnrho rua Yexus saibxyuas  
Najnub nyob kuv tso sab plhuav.

“13 Tug kws muaj kev hhub luj tshaajplawg, yog tug kws zoosab tuag theej nwg cov phoojywg. 14 Yog mej ua lawvle kuv has, mej txhaj yog kuv cov phoojywg. 15 Nwgnuav kuv tsi hu mej ua tubkhai lawm, rua qhov tug tubkhai tsi paub sov nwg tug tswv ua dlaabtsi. Tabsis kuv hu mej ua phoojywg, rua qhov kuv tub qha txhua yaam kws kuv Txiv qha rua kuv rua mej lawm.”  
Yuhaas 15:13-15 (PTT)

## **23I. NWGNUAV KUV LUG NTSEEG YEXUS**

Nwgnuav kuv lug ntseeg Yexus  
Kuv yuav nrug Nwg moog txhuanub  
Taug kev zoo los taug kev phem  
Kuv yuav tsi tso Yexus povtseg

Muaj txujsa nyob ntev pestsawg  
Thaus tauzoo los nyuajsab kawg  
Vaajtswv paab taag kuv simneej  
Tug Tswv Yexus yog tug Cawmseej.

Muaj qeenub tuabneeg tshev kuv  
Muaj qeenub nyob kaajsab lug  
Txawm yog lecaag los puamchawj  
Kuv paub Yexus tseem hlub kuv kawg.

Kuv tsi ntshai kevpluj kevtuag  
Kuv lub neej Yexus saibxyuas  
Yexus nrug kuv nyob uake  
Nwg nrugnraim kuv tuavrawv kuv teg.

## **238. TSWV YEXUS YOG TXHUAAYAAM RUA KUV**

Tswv Yexus yog txhuayaam rua kuv  
Nwg yog tug kws cawm kuv txujsa  
Nwg muab lub sabtshab pub rua kuv  
Nwg yog tug nplig kuv lub sab

Thaus kuv nyuajsab kuv moog cuag Nwg  
Vim tsi muaj leejtwg yuav totaub kuv  
Kuv lug kuamuag Nwg so taagnrho  
Nwg yog kuv tug kwvluag.

Tswv Yexus yog txhuayaam rua kuv  
Nwg paab kuv thaus kuv raug txomnyem  
Nwg pub tshaavntuj lugnaag rua kuv  
Nwg najnub nrug kuv uake.

Tswv Yexus yog txhuayaam rua kuv  
Txawmyog kuv tsi muaj phooj muaj ywg  
Tabsis Nwg tseem najnub hlub kuv  
Vim Nwg yog kuv tug phoojywg.

## 239. YEXUS LUG UA KUV TUG PHOOJYWG

Yexus lug ua kuv tug phoojywg  
Nwg lug paab kuas kuv dlimtxim  
Kuv yog tuabneeg kws tsi tsimtxaj  
Nwg lug cawm kuv tug ntsujplig.

Haleluyas kuv tug Cawmseej  
Nwg lug ua kuv tug phoojywg  
Nwg lug paab kuas kuv dlim lub txim  
Nwg coj kuv moog cuag Vaajtswv.

Yexus txhawb kuv lub dlaag lub zug  
Nwg nyob ze tuavrawv kuv teg  
Kuv najnub raug txuj kev ntseevntxag  
Nwg tsomkw tsi pub yuamkev.

Yexus yog kuv tug Tswv yug zoo  
Nwg puag kuv huv Nwg xubndlag  
Kuv yuav noj Nwg tej zaub tej mov  
Txha yuav cawm tau kuv txujsa.

Yexus dlaws kuv lub txim povtseg  
Nwg qha kuas kuv yug dlua tshab  
Kuv khaws Nwg tej Lug Qha lug coj  
Kuv nrug Nwg koom ib txujsa.

## 242. PEB NRUG YEXUS MOOG KEV

Peb nrug Yexus moog kev  
Vaamkhom Nwg tuav peb teg  
Kev tsausntuj huysi hloov ua tshaavntuj  
Nrug Nwg moog tsi xob thim  
Nwg nrug peb nyob ibsim  
Hab nrug suavdlawg kws ntseeg hab nooglug.

Ntseeg hab nooglug, tsi muaj dlua lwm txujkev  
Yuav zoosab cuag Yexus txuj  
Yuavtsum ntseeg hab nooglug.

Yog muaj dluab tuaj ntxoov roog  
Yog muaj txujkev tsi zoo  
Los Yexus yuav nrugnraim peb txhuatug  
Txuj kevpluj txuj kevtuag  
Kev txhawjxeeb kev quajntsug  
Peb tsi ntshai yog peb ntseeg hab nooglug.

Thaus peb qha Vaajtsvw Lug  
Yog peb ntsib luastej ntxub  
Peb tub paub luas yeej xub ntxub Yexus  
Yog peb raug luas thuam hab  
Yog peb najnub nyuajsab  
Yuavtsum muab sab rau ntseeg hab nooglug.

Yog peb khauvxwm kev phem  
Pheej tsi xaav muab tsotseg  
Yuav tsi muaj kev tauzoo kaajsab lug  
Muab kev phem tso povtseg  
Ca Yexus coj peb kev  
Nwg yuav paab yog peb ntseeg hab nooglug.

Peb noog Yexus lug qha  
Xyum ua hum Vaajtsvv sab  
Peb txhuatug txha le yuav txawj sishlub  
Lub nraa sib lub nraa nyaav  
Los peb yeejyuav sispaab  
Peb yuavtsum rau sab ntseeg hab nooglug.

## 248. YEXUS COJ KUV MOOG QHOVTWG

Yexus coj kuv moog qhovtwg kuv lawv Nwg qaab  
Coj kuv moog txuj kev ncetoj los kev nqeghaav  
Txawmyog txuj kev kws kuv moog ntawd yog kev nqaim  
Yexus coj kuv moog qhovtwg los kuv tsi ntshai.

Moog qhovtwg, moog qhovtwg!  
Kuv tsi ntshai kevtuag  
Yexus coj kuv moog qhovtwg  
Kuv tsosab plhuav.

Yexus coj kuv moog qhovtwg kws tsausntuj nti  
Coj moog raug txuj kev txomnyem los kev kaajnrig  
Dlaab Ntxwjnyoog pheej ntxag Kuv kuas kuv thim rovqaab  
Yexus coj kuv moog qhovtwg Nwg tawmtsaam Dlaab

Yexus coj kuv moog qhovtwg Nwg tsomkwm kuv  
Moog nrug cov ntseeg nyob uake kawm Vaajtsvv Lug  
Lossis khaiv kuv moog nrhav cov tsi tso Dlaab tseg  
Yexus coj kuv moog qhovtwg Nwg tuav kuv teg.

“7 Kuv ua tug Tswv tsaug, rua qhov nwg coj kuv txuj hauv kev, hab montuj los kuv lub sab pheej ntuaq kuv tsitseg. 8 Kuv yeej ncuntnsoov has tas, tug Tswv nrugnraim kuv; yeej tsi muaj ib yaam ua rua kuv ntshai, rua qhov nwg nyob ze kuv.” Ntawvnkauj 16:7-8 (PTT)

## 259. YEXUS COJ KUV MOOG KEV

Yexus coj kuv moog kev tshaavntuj  
Kuv paub lenuav kuv sab tajtug  
Kuv moog qhovtwg ua dlaabtsi los  
Tswv Yexus coj kuv moog tag-tag.

Nwg coj kuv moog, Nwg coj kuv moog  
Nwg tuav kuv teg coj kuv moogkev  
Kuv vaamkhom Nwg kuv nrug Nwg moog  
Kuv nrug Tswv Yexus moog uake.

Tej zag kuv muaj txuj kev zoosab  
Tej zag kuv raug kev txomnyem hab  
Tsi ntshai kuv paub muaj ibtug hlub  
Kuv paub Tswv Yexus tseem coj kuv.

Uatsaug Yexus Koj tuav kuv teg  
Thov tuav zoo-zoo coj kuv moogkev  
Lub sab lub ntsws hab tug ntsujplig  
Kuv pub rua Koj lawv Koj ibtxhis.

Txug thaus sijhawm kuv txujsa tu  
Lub caij moog sau ntuj lug txug kuv  
Thov pub kuv muaj sabtawv sabtuab  
Thov tuav kuv teg hlaa dlhau kevtuag.

"**1** Tug Tswv yog tug tsomkwm kuv, kuv muaj txhua yaam txaus, **2** nwg ca kuv su huv lub tshaav kws muaj zaub mognyoos ntsuab xab hab nwg coj kuv moog rua ntawm lub paag dlejntshab kws nyob ntsagtu. **3** Nwg txhawb kuv tug zug. Nwg coj kuv taug txujkev ncaajnceeg lawvle nwg coglug tseg. **4** Tug Tswv, txawm yog kuv taug txujkev kws tsausntuj nti los kuv tsi ntshai dlaabtsi, ruaqhov koj nrugnraim kuv. Koj tug paas hab tug cwjnreg tsomkwm kuv. **5** Koj npaaj rooj noj rooj haus rua kuv, taabmeeg kuv cov yeebncuab; koj togtxaits kuv ibyaam le tug qhua kws koj saib hlub, hab koj laub rua kuv lub khob puv npluamaq. **6** Kuv paub has tas koj yog tug zoo tshaajplawg hab hlub kuv moog taag kuv tamneej, hab kuv yuav nyob huv kuv tug Tswv lub tsev moog taag kuv lub neej."

Ntawvnkauj 23 (PTT)

## 262. TSWV YEXUS YOG TUG YUG ZOO

Tswv Yexus yog tug Tswv Yug Zoo  
Nwg saib hab yug Nwg paab yaaj  
Nwg taugkev moog ua cov yaaj ntej  
Ces cov yaaj sawv lawv Nwg qaab  
Cawmseej Yexus, Cawmseej Yexus  
Peb txhuatug yog Koj cov yaaj  
Cawmseej Yexus, Cawmseej Yexus  
Koj uantej peb yuav lawvqaab.

Peb yog cov kws ntseeg koj lub npe  
Peb najnub taug Koj txuj kev  
Yog leejtwg yuamkev poobzoo lawm  
Thov Koj coj nwg rovlug tsev  
Cawmseej Yexus, Cawmseej Yexus  
Peb yuav nyob huv Koj xubndlag  
Cawmseej Yexus, Cawmseej Yexus  
Peb yuav khaws Koj Txujlug Qha.

Txhuatug yaaj kws txaav lug cuag Koj  
Koj yuav tsitso nwg povtseg  
Peb tub yuamkev ua txhum ntau zag  
Tabsis Koj tseem tuav peb teg  
Cawmseej Yexus, Cawmseej Yexus  
Peb leeg kev txhum huv tuabsi  
Cawmseej Yexus, Cawmseej Yexus  
Thov ua sabntev zaam peb txim.

Txhuatug yaaj kws nyam noog Koj lug  
Yuav ua lub neej kws kaajsab  
Txij nuav moog peb yuav tso sabqub  
Ua lub neej txais yuav sabtshab  
Cawmseej Yexus, Cawmseej Yexus  
Koj yog peb tug Tswv Yug Zoo  
Cawmseej Yexus, Cawmseej Yexus  
Peb tau txais Koj txuj koobmoov.

## 288. THAUS KUV LUB SAB RAUG KEV TXHAWJ

Thaus kuv lub sab raug txuj kev txhawjxeeb  
Mas kuv tsi muaj kev thaajyeeb  
Thaus kuv raug ceeblaaj kuv lub sab tsi kaaj  
Tswv Yexus, Koj puas ncutxug kuv?

Yexus ncuntsoov, Yexus ncuntsoov  
Thaus kuv txhawj Yexus ncuntsoov  
Txawmyog ntsib kev tsausntuj los kuv  
Yeej tsi poobsab Yexus ncuntsoov kuv.

Thaus kev txomnyem lug quabyuam caijtsuj  
Kev ntshai ua limham rua kuv  
Kuv lub neej tsausnti cuagle nub tsi ci  
Tswv Yexus, Koj puas ncutxug kuv?

Thaus kev ntxeevntxag lug sim kuv lub sab  
Kuas kuv moog ua phem ua qas  
Thaus kuv lub neej qaug hab kuv sawv tsi taug  
Tswv Yexus, Koj puas ncutxug kuv?

Thaus kuv tsevneeg muab kuv tso povtseg  
Ua rua kuv lub sab hlaistrhe  
Tsi muaj chaw vaamkhom tsi xaav ua neej nyob  
Tswv Yesus, Koj puas ncutxug kuv?

"Vaajtswv yeej ncuntsoov txhua tug kws tiv kev txomnyem; nwq ncuntsoov puab tej suab quaj, hab nwq rautxim rua cov tuabneeg kws tsimtxom puab." Ntawvnkauj 9:12 (PTT)

## **289. IBNUB TXUJSA YUAV NCAIM LUB CEV**

Ibnub txujsa yuav ncaim lub cev  
Kuv yuav tsoplhuav lub nplajteb tseg  
Kuv yuav moog txug sau Ceebtsheej ntuj  
Yuav tau moog ntsib tug Tswv Yexus.

Kuv yeejyuav ntsib hab pum Nwg tag  
Tug Tswv Yesus kws paab kuv dlim  
Kuv yeejyuav ntsib hab pum Nwg tag  
Tug Tswv Yesus kws paab kuv dlim.

Ibnub peb yuav tso nplajteb tseg  
Yuav moog nyob huv Vaajtswv lub tsev  
Tswv Yesus tub moog ua peb ntej  
Moog npaaj qhov chaw tseg ca tog peb.

Ibnub kuv yuav pum Tswv Yesus  
Lug txheeb cov ntseeg ibtug zujzug  
Yog kuv muab sab rau ntseeg Nwg tag  
Kuv yuav moog txug Nwg lub xubndlag.

Kuv coj kev ncaaj kev nceeg txhuanub  
Kuv ua sabntev ntseeg hab noog Nwg lug  
Thaus Vaaj Leejtxiv qheb qhovrooj ntug  
Kuv yuav moog ntsib tug Tswv Yesus.

“Tabsis yuav tsi muaj tej kev phem kev qas, tej kev poob ntsejmuag lossis tej tuabneeg dlaag nyob huv lub nroog ntawd le, luas tsuas pub cov tuabneeg kws tub muaj npe sau ca rua huv tug Mivnyuas Yaaj phoo ntawv kws sau cov tuabneeg kws muajsa ntev moog ibtxhis lawm tej npe moog nyob huv lub nroog ntawd xwb.” Tshwmsim 21:27 (PTT)

## 290. KUV CASAB HAB LUG NTSEEG YEXUS

Kuv casab hab lug ntseeg Yexus  
Yaav tomntej yuav moog sau ntuj  
Muab lub neej huv nplajteb tsoplhuav  
Pum Yexus timntsej timmuag.

Muaj ibnub kuv yeejyuav pum Nwg  
Saibntsoov Nwg kuv yuav tsi dlhuav  
Najnub nua tsuas pum zemzuag xwb  
Kuv yuav pum timntsej timmuag.

Kuv ua neej nyob huv lub nplajteb  
Nyob ibntus yuav rov moog tsev  
Kuv yuav moog nrug Yesus nyob ntev  
Ibtxhis moog tsi paub txomnyem.

Sau Ceebtsheej tsi muaj kev quajntsug  
Hab tsi muaj kevpluj kevtuag  
Kev tshaib kev nqhes yeej tsi muaj kag  
Txhua yaam Yesus tub npaaj ca.

Kuv moog nyob ntawm Yesus xubndlag  
Cov ntseeg pe Yesus nplawgta  
Nrug Tswv Yesus nyob Ceebtsheej ntuj  
Ibtxhab ibtxhis kaajsab lug.

*"Nwg yuav so puab tej kuamuag huv tuabsi moog. Tej kev tuag, kev ntxhuv sab, kev quajntsug hab kev mob kev nkeeg yuav tsi muaj ibzag le lawm. Tej kws suavdlawg ibtxwm muaj lug tub pluj taag lawm." Tshwmsim 21:4 (PTT)*

*"He will wipe away every tear from their eyes, and death will not exist any more—or mourning, or crying, or pain, for the former things have ceased to exist."* Rev 21:4 [NET21Free]

## **29I. NUB KWS KUV YUAV NCAIM**

Nub kws kuv yuav ncaim lub nplajteb  
Mas kuv yuav muab txhua yaam tsotseg  
Muaj sab xyivfaab muaj sab tajtug  
Nrug Yexus nyob lub tsev sau ntuj.

Mas kuv yuav taabmeeg pum Nwg hab  
Yuav qhuas tas Yesus tso kuv dlim  
Mas kuv yuav taabmeeg pum Nwg hab  
Yuav qhuas tas Yesus tso kuv dlim.

Cevnqaj cabntaab cov txhaa plhaubmaag  
Yuav raug puamtsuaj ntxeev moog ua aav  
Tabsis tug ntsuj yuav yuj lisplawg  
Yaa moog rua sau Vaajtsvv tebchaws.

Moog txug Ceebtsheej mas kuv yuav muaj  
Cevnqaj dlaimtawv kws tsi puamtsuaj  
Kev txhawj kev ntshai yuav tsi muaj ntxiv  
Yuav nyob kaajsab lug moog ibtxhis.

"44 Lub cev kws luas muab log, yog lub kws muaj roj muaj ntshaav, tabsis thus Vaajtsvv tsaa sawv huv qhov tuag rovqaab lug lawm, tug ntawd muaj lub cev tshab. Yog tub muaj lub cev qub lawm yeejyuav muaj lub cev tshab... 46 Vaajtsvv xub pub tuabneeg muaj lub cev kws muaj roj muaj ntshaav, tomqaab ntawd Nwg maam le pub tuabneeg muaj lub cev tshab... 48 Tuabneeg nplajteb zoo ibyaam le tug kws Vaajtsvv muab aav lug puab, tabsis tuabneeg qaum ntuj zoo ibyaam le tug kws lug sau ntuj lug. 49 Peb tub muaj tug yaamntxwv zoole tug kws Vaajtsvv muab aav lug puab; yog lentawd peb yeejyuav muaj tug yaamntxwv zoole tug kws lug sau ntuj lug hab." 1 Kauleethaus 15:44, 46, 48-49 (PTT)

## 292. THAUS SUAVDLAWG UA NEEJ NYOB

Thaus suavdlawg ua neej nyob nplajteb  
Nyag yuavtsum xaiv nyag kev  
Muaj ib txuj nqaim muaj ib txuj dlaav  
Saib mej yuav xaiv lecaag.

Yuav moog txuj twg, yuav moog txuj twg  
Yuavtsum xaiv nwgnuav  
Nyag moog nyag txuj, moog tsi rovlug  
Yuavtsum xaiv nwgnuav.

Thov mej suavdlawg tig qhovntsej noog  
Mej txha paub xaiv txuj zoo  
Taug txuj kev nqaim tau kaajsab lug  
Lwmsim moog nyob sau ntuj.

Thaus taug kev nqaim txawm nyuaj pistsawg  
Ua ibsab moog kuas kawg  
Vaajtswv yuav tuavrawv peb txhaisteg  
Yuav najnub coj peb kev.

Thaus kws taag simneej huv nplajteb  
Peb yuav rovqaab moog tsev  
Yog peb casab rua tug Cawmseej  
Peb yuav moog txug Ceebtsheej.

Txuj kev nqaim yog tug Tswv Yexus  
Kev dlaav yog kev tsausntuj  
Txawm muaj coobleej taug txuj kev dlaav  
Mej cov tsi xob lawvqaab.

Yog mej yeejyuav taug txuj kev dlaav  
Thov mej suavdlawg ceevfaaj  
Kev dlaav moog txug lub chaw tsausnti  
Txomnyem ntevdlhawv ibtxhis.

## **293. KUV YUAV MOOG SAU NTUJKAAG**

Kuv yuav moog sau ntujkaag tag-tag

Kuv yuav moog sau ntuj tag

Yexus hlub kuv theej kuv lub txhoj

Coj kuv moog nrug Nwg nyob.

Tswv Yexus yeej yog txuj kev Tseeb

Coj peb moog txug Ceebtsheej

Txhuatug kws vaamkhom tug Cawmseej

Yuav moog txug ntuj Ceebtsheej.

Tsi muaj dlua ib txuj kev qhovtwg

Kws yuav moog txug Vaajtswv

Tabsis tug kws ntseeg Tswv Yexus

Tug ntawd moog txug sau ntuj.

Kuv yuav moog sau ntujkaag tag-tag

Kuv yuav moog sau ntuj tag

Leejtwg xaav nrug kuv moog sau ntuj

Nrug kuv ntseeg Tswv Yexus.

"1 Yexus has rúa nwg cov thwjtím has tás, "Mej tsixob txhawj hab tsi xob nyuajsab, mej cale ntseeg Vaajtswv hab ntseeg kuv. 2 Huv kuv Txiv lub tsev muaj ntáu cháav, hab kuv tqaabtom yuav moog tu chaw rúa mej. Yog tsi muaj lentawd, kuv yeejyuav tsi qha lenuav rúa mej. 3 Tháus kws kuv tu tau chaw rúa mej lawm, kuv yuav rovqaab lug hab tog mej moog nrug kuv nyob, kuv nyob qhov twg mej yeejyuav nrug kuv nyob qhov ntawd." Yuhaas 14:1-3 (PTT)

## **382. VAAJTSWV LUB CEEBTSHEEJ**

Vaajtswv lub Ceebtsheej Ntuj  
Yeejyog lub chaw zoo kawg  
Qhov txhum hab qhov qas  
Qhov txhum hab qhov qas  
Moog tsi tau lub chaw ntawd.

Tug Cawmseej Tswv Yexus  
Thov Koj paab kuas kuv dlim  
Tshem kuv qhov txhum moog  
Tshem kuv qhov txhum moog  
Thov Koj zaam kuv lub txim.

Tswv Yexus txij nuav moog  
Kuv yuav taug Koj txuj kev  
Thov Koj tuav kuv teg  
Thov Koj tuav kuv teg  
Kuas kuv tsi xob yuamkev.

Lwmnub tug Tswv Yexus  
Coj kuv moog nyob sau ntuj  
Nyob huv Nwg xubndlag  
Nyob huv Nwg xubndlag  
Kuv yuav nyob kaajsab lug.

“25 LUB NROOG NTAWD TEJ ROOJVAAG QHEBLUG CA TSI KAW LE, RUA QHOV NYOB HUV LUB NROOG NTAWD YEEJ TSI TXAWJ TSAUSNTUJ. 26 TXHUA TSAAV TUABNEEG YUAV COJ PUAB TEJ FWJCHIM HAB PUAB TEJ MEEJMOM TUAJ RUA HUV LUB NROOG. 27 TABSIS YUAV TSI MUAJ TEJ KEV PHEM KEV QAS, TEJ KEV POOB NTSEJMUAG LOSSIS TEJ TUABNEEG DLAAG NYOB HUV LUB NROOG NTAWD LE, LUAS TSUAS PUB COV TUABNEEG KWS TUB MUAJ NPE SAU CA RUA HUV TUG MIVNYUAS YAAJ PHOO NTAWV KWS SAU COV TUABNEEG KWS MUAJSA NTEV MOOG IBTXHIS LAWM TEJ NPE MOOG NYOB HUV LUB NROOG NTAWD XWB. TSHWMSIM 21:25-27 (PTT)

### 383. TSHUAV CEEBTSHEEJ NTUJ TAUZOO

Tshuav Ceebtsheej Ntuj tauzoo nyob tuaj tomntej  
Cov kws nyob Ceebtsheej Nroog tsi raug txomnyem  
Puab hunkauj suab nrov ntxhe yog lub suab kws nrov lomzem  
Puab qhuas Vaajtsww kawgnkaus hab ua Nwg tsaug.

Lug nyob huv qhov pumkev lug ntseeg Yexus  
Tswv Yexus yog Txuj Kev moog Ceebtsheej Ntuj  
Tswv Yexus yog Qhov Tseeb cawm tuabneeg nplajteb txhua leej  
Tswv Yexus yog Txuijsa rua tug ntseeg tag.

Tswv Yexus coglug tseg rua tug kws ntseeg  
Nwg moog ua vaaj ua tsev ca sau Ceebtsheej  
Nwg yuav nqeg rovlug coj cov kws ntseeg moog nrug Nwg nyob  
Cov ntseeg yuav nrug Yexus nyob Ceebtsheej Ntuj.

Lub nroog kws tsi txawj qub tsi txawj puagntsoog  
Yog lub nroog Ceebtsheej Ntuj qhov chaw tauzoo  
Lub nroog nyob ruaj nyob khov tsi txawj puag hab tsi txawj pob  
Nroog Yeluxalees tshab mas ci ntsaa-ab.

"1 Tug timtsw ceebtsheej kws qha tug dlej cawmsav kws ci pumkev tshaabplawg  
le dlaimav rua kuv. Tug dlej ntawd ndlwg sau Vaajtsww hab tug Mvnyuas Yaaj lub  
zwmtxww lug. 2 hab ndlwg taug txujkev huv plaw nroog. Ob saab ntug dlej puavleej  
muaj tsob txiv ntoo cawmsav kws ib xyoos twg txi kaum-ob phaumtxiv, ib hlis twg  
txi ib phaum Tsob ntoo ntawd tej nplooj yog hauv tshuaj kuab muajtsuas kws khu  
tau txhua tsaav tuabneeg. 3 Yeej tsi muaj tej kws Vaajtsww foom tsi zoo rua lawm  
nyob huv lub nroog ntawd hlide. Vaajtsww hab tug Mvnyuas Yaaj lub zwmtxww yuav  
nyob huv lub nroog ntawd, hab nwg cov tubkhai yuav pehawmnwg. 4 Puab yuav pum  
nwg lub ntsejmuag, hab nwg yuav sau nwg lub npe rua ntawmpuab hauvplaj. 5 Yuav  
tsi muaj montuj le lawm puab yuav tsi tawsteeb hab tsi taag yuav muaj tshaavntuj,  
ruaqhov tug Tsw kws yog Vaajtsww yuav ci rua puab pumkev, hab puab yuav ua  
vaajntxww kaav lub nroog ntawd moog ibtxhis le." Tshwmsim 221-5 (PTT)

## 384. NYOB CEEBTSHEEJ ZOO DLUANDLAIS

Nyob Ceebtsheej zoo dluandlais nplajteb nuav  
Yog peb muab sab rau ntseeg peb yuav pum  
Peb tug Tswv Yexus tub moog uantej  
Ua lub tsev rua peb nyob zoo kawgnkaus.

Tshuav tsi ntev Tswv Yexus  
Coj peb moog nyob Ceebtsheej txha tsi khwv  
Tshuav tsi ntev Tswv Yexus  
Coj peb moog nyob Ceebtsheej txha tsi khwv.

Nyob Ceebtsheej cov kws ntseeg nyob uake  
Suavdlawg yuav qhuas tug Cawmseej Yexus  
Peb tub dlim kev nyuajsab kev txomnyem  
Tsi muaj ib nyuas qhov txhawj ibtxhis moog

Peb yuav ncu Vaajtswv tshaavntuj ibtxhis  
Nwg tso Yesus ua peb tug Cawmseej  
Nwg yeej muaj lub sabdlawb lub sabzoo  
Nwg paab peb tau kev zoo ibsim neej.

"Yesus has tas, "Mej ua tuabzoo noog kuv tej lug! Kuv tub yuav lug sai-sai nuav! Tug kws ua lawvle tej lug kws sau rua huv phoo ntauvv nuav yog tug kws tau nyob kaajsab lug!" Tshwmsim 22:7 (PTT)

## **385. AU, VAAJTSWV YEXUS, YOG KUV TUAJTIS**

Au, Vaajtswv Yexus, yog kuv tuajtis le noog  
Ntshai kuv yuav xaav yaa  
Moog txug ndlua sau Ceebtsheej nroog  
Qhov ntawd tsi muaj kev  
Txomnyem hab kev tshaibnqhes  
Tsuas muaj kev zoosab  
Ntevdlhawv moog ibtxhis le.

Vaajtswv, thov coj kuv  
Au, Vaajtswv thov coj kuv  
Coj kuv moog nrug Koj nyob  
Coj kuv moog nrug Koj nyob.

Yug vaam yug tug zug  
Moog tsi txug Ntuj Ceebtsheej  
Yuav tau vaam Yexus  
Tug kws yog yug tug Cawmseej  
Yug nyob huv nplajteb  
Yug tsuas nyob ibntus xwb  
Thaus dlhau lub nplajteb  
Yug yuav moog ntsib Vaajtswv.

Thaustwg Tswv Yexus  
Koj maam nqeg rovlug dlua  
Lug paab kuas kuv dlim  
Kev txomnyem hab kev quajntsuaq  
Kuv tsaug tsi muajzug  
Thov Koj lug paab txhawb kuv  
Kuv casab ntsoov tas  
Tswv Yexus yuav paab kuv.

## 386. YEXUS MOOG TU CHAW TSEG

Yexus moog tu chaw tseg  
Ca puag sau ntuj Ceebtsheej  
Nwg Phoo Ntawv qha has tas  
Nwg yuav lug tog cov ntseeg  
Peb casab tshuav tsi ntev  
Peb yuav nrug Yexus nyob  
Yexus yuav rovslug dlua  
Ca peb ua sabntev tog.

Yexus qha tseg has tas  
Kuv lub tsev muaj ntau chaav  
Zoonkauj kawg txaussab kawg  
Kuv lub tsev yeej zoo tshaaj  
Tsi muaj tuabneeg muaj mob  
Tsi muaj tuabneeg muaj nkeeg  
Tsi muaj quaj tsi muaj pluag  
Tsuas nyob qhuas tug Cawmseej.

Tej txuj kev sau Ceebtsheej  
Luas muab kub coj lug pua  
Tej lub tsev nyob khovkho  
Tsi muaj iblub puamtsuaj  
Tsi muaj leejtwg tawsteeb  
Tswv Yexus ci ntsaa-ab  
Cov tuabneeg kws moog nyob  
Yog cov kws tau txujsa.

“6 Thaus txug lub sijhawm ntawd, yuav tsi muaj ntujno hab dlejnkoog, 7 lossis tsi muaj kev tsausntuj. Txawm yog montuj los yuav hloov ua nruabnub pumkev kaajnrig. Tsuas yog tug Tswv tuableeg xwb txhaj paub has tas, thaus twg lub sijhawm nuav maamle lug txug. 8 Thaus txug nub ntawd, yuav muaj ib tug dlej txhawv huv lub nroog Yeluxalees lug, ib ceg yuav ndlwg moog rua nraag Havtxwv Tuag hab ib ceg yuav ndlwg moog rua tom Havtxwv Meditelanees. Tug dlej ntawd yuav ndlwg thawsnaj thawsxyoo, tsi has lub caij ntujqhua lossis lub caij ntujnaag.” Xekhaliyas

## **387. VAAJTSWV QHA NWG TXUJLUG**

Vaajtswv qha Nwg Txujlug  
Rua peb suavdlawg txhuatug  
Moog nrug Vaajtswv nyob sau Ceebtsheej Ntuj  
Tsi muaj nub tsi muaj hli  
Tsi taag yuav tawsteeb ci  
Yexus ua rua peb pumkev kaajnrig.

Nrug Tswv Yexus nyob Ceebtsheej Ntuj  
Txhuatug muaj kev tauzoo kaajsab lug  
Tsi muaj kev quaj tsi muaj kevtuag  
Tsi txawj laug peb yuav nyob tsosab plhuav.

Vaajtswv qha huv Phoo Ntawv  
Qhov txhua chaw zoonkauj kawg  
Luas muab kub lug pua tej kev huv plawv  
Huv lub nroog luas qheb kag  
Tej qhov rooj cuablug ca  
Tsi muaj ibnyuas qhov phem lossis qas.

Vaajtswv qha rua peb paub  
Tsi muaj txag tsi muaj tsaus  
Hab tsi muaj ibtug kws yuav txawj laug  
Nrug kwvtij nyob uake  
Huv Vaajtswv Ntuj lub tsev  
Yuav tsi muaj leejtwg raug kev txomnyem.

"22 Kuv tsi pum muaj ib lub tuamtsev nyob huv lub nroog ntawd le, ruaqhov tug Tswv kws yog Vaajtswv tug kws muaj Fwjchim Luj kawgnkaus hab tug Mivnyuas Yaaj yog lub tuamtsev ntaag. 23 Huv lub nroog ntawd tsi muaj nub lossis hli ci, ruaqhov Vaajtswv tug tshwjchim yeej ci ntsaa-ab tuaj rua huv, hab tug Mivnyuas Yaaj yog lub teeb kws ci rua suavdlawg pumkev. 24 Txhua tsaav tuabneeg yuav pumkev kaajnrig moog-moog lug-lug, hab tej vaajntxwv kws nyob huv nplajteb yuav nqaa puab tej nyaj tej kub hab tej qhov txhuachaw tuaj rua huv lub nroog. Tshwmsim 21:22-24 (PTT)

## 388. MUAJ IBNUB COV KWS NTSEEG YEXUS

Muaj ibnub cov kws ntseeg Yexus  
Yuav ibtxhij moog sau ntuj  
Nyob ntawm Yexus xubndlag  
Hab hunkauj qhuas has tas.

Vaajtswv hlub peb, Nwg txha txhwv  
Kuas peb dlim peb lub txim  
Peb yuav najnub ua  
Tswv Yexus tsaug moog ibtxhis.

Cov kws yuav tau moog nyob Ceebtsheej  
Yog cov muaj sab rau ntseeg  
Puab tub hloov dlua sabtshab  
Hab hunkauj qhuas has tas.

Mej cov kws nyob huv kev tsausntuj  
Tsi tau ntseeg Tswv Yexus  
Cale lug ntseeg Nwg kag  
Hab hunkauj qhuas has tas.

Yog tas nubnua mej txavtxim sab  
Hab lug txais yuav txujsa  
Mej hab peb yuav zoosab  
Hab hunkauj qhuas has tas.

"Mej cale ua tuabzoo noog, kuv yuav qha zaaj kws mej tsi tau nov dlua rua mej noog; peb txhua tug yuav tsi tuag huv tuabsi, tabsis thus tshuab raaj tshuab xyu zag kawg, tuab ntsaismuag xwb peb yuav hloov dlua lub cev tshab. Ruaqhov thus tshuab raaj tshuab xyu, cov kws tuag lawm yuav sawv huv qhov tuag rovqaab lug, hab peb suavdlawg yuav hloov dlua lub cev tshab kws tsi txawj tuag le lawm." 1 Kauleethaus 15:52 (PTT)

## **389. HUNKAUJ TXHAWBNQAA TUG TSWV YEXUS**

Hunkauj txhawbnqaa tug Tswv Yexus  
Tug Tswv kws hhub peb noobneej  
Lug ua kev rua peb moog sau ntuj  
Npaaj chaw rua peb nyob Ceebtsheej.

Thaus peb moog txug ntuj Ceebtsheej  
Peb lub neej yuav tsi muaj kev txob kev txhawj  
Peb yuav qhuas tug Cawmseej  
Has tas Nwg tau paab peb dlim lawm.

Lub neej ua qhua nyob huv nplajteb  
Tsausntuj quasnti le tsausfuab  
Xaav txug Ceebtsheej zoole nyob dleb  
Sov nub twg maam moog txug ndlua.

Peb yuavtsum tau muab sab rau ntseeg  
Npaaj kuas txhij nrug Vaajtswv nyob  
Xy whole ua lub neej taug kev ncaajnceeg  
Moog nyob Ceebtsheej txha tsimnyog.

Muaj ibnub qhovrais ntuj yuav qheb  
Peb yuav pum lub nroog Dlawbhuv  
Yuav zoosab tsi pumqaab pav le  
Thaus moog txug sau ceebtsheej ntuj.

"Puab hu nkauj has tas: "Tug Mivnyuas Yaaj kws tuabneeg muab tua lawm, koj yog tug muaj fwjchim hab yog tug kws npluanuj, yog tug kws muaj tswvyim hab muajzug. Tsimnyog peb fwm koj, hab ua rua koj tau koobmeej!" 13 Kuv nov ib puas tsaavyaam kws muajsa, tsi has tej kws nyob sau ntuj, nyob huv nplajteb nuav, nyob huv nruab tivtxwv hab nyob huv havtxwv hu nkauj has tas: "Peb suavdlawg yuavtsum fwm, yuavtsum qhuas, yuavtsum pehawm hab ua rua tug kws nyob sau lub zwmtxwv hab tug Mivnyuas Yaaj tau koobmeej moog ibtxhis le." Tshwmsim 5:12 (PTT)

## **390. VAAJTSWV LUB TEBCHAWS**

Vaajtswv lub tebchaws ci ntsaa-ab  
tsi siv lub nub lub hli  
Vaajtswv tshwjchim ci dlawb ci tshab  
Txhuatug pumkev kaajnrig  
Txhuatug pumkev kaajnrig.

Tsi muaj ib yaam nyob huv nplajteb  
Yuav pev tau ntuj Ceebtsheej  
Nplajteb muaj kev uatauj uaqhev  
Ceebtsheej muaj kev thaajyeeb  
Ceebtsheej muaj kev thaajyeeb.

Tsi tsimnyog kuv tau ntuj Ceebtsheej  
Coj lug ua kuv ndlagtug  
Tabsis tubyog kuv tug Cawmseej  
Muab pub dlawb-dlawb rua kuv  
Muab pub dlawb-dlawb rua kuv.

Kuv ntseeg hab casab ntsoov has tas  
Kuv yuav moog txug Ceebtsheej  
Moog nyob huv Vaajtswv lub xubndlag  
Muaj kev thaajyeeb nyaabxeeb  
Muaj kev thaajyeeb nyaabxeeb.

“Vaaj Ntsujplig lug kaav taagnrho kuv lub sab, ces tug timtswv ntawd coj kuv nce moog sau ib lub ncovroob sab-sab. Nwg tawteg qha lub nroog Yeluxalees rua kuv saib, yog lub Nroog Dlawbhuv kws taabtom lug ntawm Vaajtswv tug kws nyob sau ntuj lug, 11 hab Vaajtswv tug tshwjchim ci ntsaa-ab huv lub nroog ntawd tuaj. Lub nroog ntawd ci ntsaa-ab ibyaam le lub qaizeb ci-ci kws muaj nqes hu ua manixaus; lub qaizeb ntawd pumkev tshaabplawg ibyaam le dclaim av.” Tshwmsim 21:10-11

## **392. SAU CEEBTSHEEJ NRUG VAAJTSWV NYOB**

Sau Ceebtsheej nrug Vaaitswv nyob  
Txhua lub tsev zoo ruajkhov  
Lub nroog ntawd tsi txawj puamtsuaj  
Kev tsausntuj los yeej tsi muaj.

Vaaitswv so peb lub kuamuag  
Yuav tsi muaj txuj kev quajntsuag  
Sau Ceebtsheej tsi suav caij suav nyoog  
Vim tsi muaj nub, hli, hab xyoo.

Sau Ceebtsheej tsi muaj tsausntuj  
Vim yog muaj Tswv Yexus  
Yeej tsi muaj lub nub lub hli  
Yexus tuableeg ci kaajnrig.

Sau Ceebtsheej xuas kub pua kev  
Tsi muaj leejtwg txomnyem  
Yeej tsi muaj tubsaab tubnyag  
Tej qhovrooj yeej qheblug ca.

Sau Ceebtsheej tsi txag tsi kub  
Suavdlawg nyob kaajsab lug  
Yeej tsi muaj kevpluj kevtuag  
Suavdlawg yuav nyob tsosab plhuav.

"15 Yog lentawd puab txhaj tau lug sawv taabmeeg ntawm Vaaitswv lub zwmtxwv, pehawm Vaaitswv taagnub taagmo huv lub Tuamtsev. Tug kws nyob sau lub zwmtxwv yuav nrug puab nyob hab tsomkwmuab. 16 Puab yuav tsi tshaib tsi nqhes; naag yuav tsi ntub hab tshaav ntuj yuav tsi kub puab le lawm. 17 Ruaqhov tug Mivnyuas Yaaj kws sawv ntawm lub zwmtxwv yuav yug puab hab coj puab moog haus tej qhov dlejtxhawv kws cawm tuabneeg txujsa. Hab Vaaitswv yuav so puab tej kuamuag huv tuabsi moog." Tshwmsim 7:14-17 (PTT)

### **393. NROOG YELUXALEES TSHAB**

Nroog Yeluxalees tshab  
Yog nroog Ceebtsheej  
Kuv xaav moog pum  
Lub nroog ntawd yog qhov chaw tauzoo  
Thaustwg kuv maam moog txug.

Nroog Yeluxalees tshab  
Vaajtswv npaajtseg rua tug kws ntseeg  
Txhuatug kws leeg Tswv Yexus ua tug Cawmseej  
Yuav muaj feem nrug Tswv Yexus  
Nyob ua ibke sau ntuj Ceebtsheej.

Lub nroog ntawd yeej tsi siv  
Lub nub lub hli lug ci pumkev  
Rua qhov lub nroog ntawd tsi  
Muaj kev tsausntuj le nyob nplajteb.

Muaj ib tug dlej ntshab ndlwg  
Huv lub nroog ntawd yog dlej cawmsav  
Ob saab ntug dlej muaj ntoo tawgpaaj  
Txitxiv tsw qaabzib ntxag.

Cov nploojntoos hlaav ntsuabxab  
Ntawm txhua tso ntoo yog kuab yog tshuaj  
Ntuj Ceebtsheej txha tsi muaj  
Kev mob kev nkeeg kevpluj kevtuag.

Cov pejxeem nyob Ceebtsheej txhuatug  
zoosab puab qhuas Vaajtswv  
Puab seevsuab lug hunkauuj txhawbnqaa  
Vaajtswv kawgsab kawgntsaws.

## **394. KUV YUAV TAU MOOG TXUG**

Kuv yuav tau moog txug kuv Leejtxiv lub tsev  
Kuv Leejtxiv lub tsev  
Kuv Leejtxiv lub tsev  
Kuv yuav tau moog txug kuv Leejtxiv lub tsev  
Yuav tau nyob ibtxhis moog.

Kuv Leejtxiv lub tsev nyob sau ntuj Ceebtsheej  
Nyob sau ntuj Ceebtsheej  
Nyob sau ntuj Ceebtsheej  
Kuv Leejtxiv lub tsev nyob sau ntuj Ceebtsheej  
Yuav tau nyob ibtxhis moog.

Yexus yuav coj kuv moog txug Leejtxiv tsev  
Moog txug Leejtxiv tsev  
Moog txug Leejtxiv tsev  
Yexus yuav coj kuv moog txug Leejtxiv tsev  
Yuav tau nyob ibtxhis moog.

Kuv yeejyuav ntsib koj huv Leejtxiv lub tsev  
Huv Leejtxiv lub tsev  
Huv Leejtxiv lub tsev  
Kuv yeejyuav ntsib koj huv Leejtxiv lub tsev  
Yuav tau nyob ibtxhis moog.

Nrug kuv moog uake nyob sau Leejtxiv tsev  
Nyob sau Leejtxiv tsev  
Nyob sau Leejtxiv tsev  
Nrug kuv moog uake nyob sau Leejtxiv tsev  
Yuav tau nyob ibtxhis moog.

## **Thau-u Vaajtsvw Tsim Tuabneeg**

*(Zaaj nuav nyob phoo nkauj qub)*

1. Thau-u Vaajtsvw tsim neeg lug nyob huv nplajteb  
Nwg tsim kuas zoonkauj kuas zoonraug Vaajtsvw hlub kawg  
Nrug obtug sisraug zoo
2. Tabsis ob tug ntawd tsi nyam noog Vaajtsvw lug  
Vaajtsvw txha ntab obtug tawm huv qhovchaw zoo moog  
Obtug raug kev plujtuag.
3. Thaus ntawm lug neeg suavdlawg puavleej ua txhum taag  
Nyag txha tsiv nyag moog nyob txhua-txhua qhovchaw taagnrho  
Tsi ncu Vaajtsvw tshaavntuj.
4. Neeg raug kev txomnyem hab raug kev quaj kev nyav  
Pe dlaab hab pe mlom tsi muaj leejtwg fwm Vaajtsvw  
Ua dlaabtauj ua dlaabqhev.
5. Tswv Yexus yeej tsi tau ua ibnyuas qhov txhum  
Vaajtsvw txha khaiv Vaajtsvw Leejtwug lug nrug neeg nyob  
Yexus lug yug ua neeg.
6. Tswv Yexus yeej tsi tau ua ibnyuas qhov txhum  
Tabsis luas muab Yexus ntsa sau tug ntoo khaublig  
Nwg tuag theej peb lub txhoj.
7. Cov thwjtum muab Yexus lub cev moog fausca  
Cov tubrog zuv nruij tsi pub leejtwg qheb qhov ntxaa  
Puab ntshai yuav muaj neeg nyag.
8. Tau peb nub Vaajtsvw tsaa Yexus sawv rovlug  
Nwg kovyeej kevtuag hab nwg kovyeej dlaab Ntxwjnyoog  
Yexus sawv huv qhov tuag.
9. Yexus ntuag cov thwjtum kuas suavdlawg ncuntsoov  
Vaajtsvw tug Ntsujplig yuav lug nrug puab suavdlawg nyob  
Kuas moog qha txuj Moo Zoo.
10. Yexus yuav rovlug rua huv lub nplajteb nuav  
Yexus yuav rautxim rua txhuatug tsi tso dlaab tseg  
Coj cov ntseeg moog sau ntuj.

# Tsixob Taag Kev Casab Mag!

Cov phoojywg, nyob lub nplajteb nuav ces peb yeejyuav muaj kev nyuajsab ntxhuvplawv lenuav ibzag taag ibzag tuaj le. Txawm lentawd los ca tej nkauj nuav ua ib cov suab has tujtawg rua peb lub sab, ua ib qhov kev txhawbzug rua peb ibzag dlhau rua ibzag moog os.

Nubnua koj nyuajsab hab ntsib txuj kev tsausntuj lov! Thov tug Tswv Yesus ua tug Tswv tuav koj teg, hab nrug koj nyob. Nwg yuav paab kuas koj tiv taug dlhau os. Tsixob ca koj ibleeg tiv mag! Uantej Tswv Yesus yuav ncaim Nwg cov thwjtum moog, Nwg coglug has tas Nwg yuav tsi ca puab nyob uantsuag nua os (Yuhaas 14:18). Yogle, tsi has lub sijhawm twg losxij, koj yuav ntsib kev nyuajsab ntxhuvplawv, yuav ntsib kev plujtuag, yuav ntsib kev txhawj kev ntshai, yuav tau kev twg es tsi paub yuav ua lecaag, hab lwmjaam kev tsausntuj nti lecaag los ncuntsoov tas tug Tswv Yesus nyob ze koj. Nwg hlub koj, Nwg xaav puag koj rua huv Nwg lub xubndlag os. Koj has rua Nwg le nuav: "Tswv Yesus, Koj nyob ko lov! Tsi muaj leejtwg paub kuv txuj kev txhawj hab kev nyuajsab le os, tsuasyog Koj tuableeg xwb txha paub txhua yaam kws taabtom raug kuv nuav. Kuv thov Koj paab kuv ris kuv lub nraa nuav, kuv ris tsitaug lawm os! Kuv tuav kuv tug Tswv Yesus lub npe kws Dlawvhuv hab muaj Fwjchim thov, Amees!"

Vaajtsww Txujlug qha tas Vaajtsww najnub ris peb lub nraa ibnub dlhau ib nub nua os (Ntawvnkauj 68:19). Yog koj tub thov taag le sautoj nuav lawm ces casab tas tug Tswv Yesus tub nov lawm, Nwg yuav paab koj os. Yog koj xaav kuas xwbfbw thov Vaajtsww paab koj ntxiv los cale nrhav ibtug xwbfbw hab hu rua nwg os.

Thov Vaajtsww txhawb hab paab kuas koj yuav tiv taug dlhau!

**Grace Hmong Alliance Church © 8/2025/NK**

---

4400 N. Mayfair Rd, Wauwatosa, WI 53225 \* [www.ghalliance.org](http://www.ghalliance.org) \* Email: [info@ghalliance.org](mailto:info@ghalliance.org)